


PHARE WA NTLHA

M.R.T. MAKGENG



AFRICA
PL
8747
.9
MAK

Kefilwe Mokone
3ZN

PHARE WA NTLHA



M.R.T. MAKGENG

© M.R. Makgeng

All rights reserved. No part of this publication may be reproduced, stored in a retrieval system, or transmitted in any form or by any means, electronic, mechanical, photocopying, recording or otherwise, without the prior permission of the copyright owner.

First Published in 1991

ISBN: 99912 69 02 9

Set in 11/13 pt Times

Typesetting by Statistical Services (Pty) Limited, Gaborone

Printed by Morija Printing Works, Morija – Lesotho



BD547100



Distributed by Botsalo Books, PO Box 1532, Gaborone, Botswana

KETAPELE

Mmadi wetsho o motswana, ke motswana. Batho ba ba tshelang ka temo. Babadi ke lo begelela semela se gantsi re se fitlhelang kwa tshimong ke seo, PHARE! Wa me ke o o sa ntseng a le lereme. Ke ka moo ke reng PHARE WA NTLHA. Ka maboko a lokwalo lo ke simolola go leka go bina koma le ba ba tllileng pele ga me. Ka jalo fa ke tlaitseng teng lo nkinele diatla metsing kana ga twe, "morogo wa ngwana..." betsho. Maboko a PHARE WA NTLHA a ama dilo di le dintsi mo Botswana, tota le bone batho jaaka boTautona Masire jalojalo.

Go a ntlama go kopanya diatla ke bo ke wa ka mangole go leboga bangwe ba ba nthusitseng mo maitekonyaneng a. Wa ntlha ke Mme B.S. Moatlhodi yo o nnileng le seabe mo go lebeng mangwe a maboko a lokwalo lo. Ke tlaa bo ke dira phoso go tlogela Borre M.B. Kelaotswe, S.O. Mothei le O.M. Gaborone ba le bone ba iphileng nako ya go ntsha tsa bone dikgakololo. Ke rolela nkgonne Billy Mokgosi hutshè ka ke ene a ntlhotlheleditseng mowa wa go gatisa maboko a go dira lokwalo. Pheletsong ke leboga mohumagadi wa me P.M.R. Makgeng go bo a ile a tlanya maboko lokwalo lo e sa ntse e le mokwalo wa seatla. Robalelwa ke ditlhokwa motho wa mmala wa thupa tsa maretlwa.

Mokwadi
M.R.T.M.

PHARE WA NTLHA:

DITENG

Tsebe

1	Kgosi Monare Rabasha-a-Gaborone	4
2	Molefi Segokgo (Rre)	5
3	Tautona Dr Quett K. Masire	6
4	Moeti-a-Sedumedi-a-Matlala-a-Molefe-a-Gaborone	7
5	Nelson Mandela	8
6	Motsofe	9
7	Khutsana	10
8	Moithuti	12
9	Bagale ba Aferika	13
10	Motsadi	14
11	Pula	15
12	Leuba	15
13	Lorato	17
14	Loso	17
15	Kgaruru ya Dintsho	19
16	Tlole Molao-Gaborone	20
17	Popapopa e a Popaganyetsa	20
18	Maikutlo a me a Letsatsi Leo	21
19	Morakana Mosa ga o Lapise	22
20	Sala Sentle Moratiwa	23
21	Mmualebe	23
22	Boemedi jwa Palamente	24
23	Molepolole College of Education (M.C.E.)	25
24	Kago ya Lebala Legolo la Metshameko	26
25	Gaborone Secondary School	27
26	Tsa Ditlhaeletsanyo mo Botswana	28
27	Matlala Secondary School	29
28	Tau	30

29 Khumo le Lehuma di Lala Mmogo	30
30 Bodumedi	31 0
31 Molelo wa Mariga	32
32 Lebatla la Batlokwa	33
33 Tshwene	33
34 Nnete	34
35 Thuto	35
36 Molomo	36
37 Kgoroso ya Moeng	37
38 Tlhaolele	37
39 Selelo sa Baithuti - M.C.E. (1988)	38
40 Morwalela wa Mahalapye-Ngwanatsele 1987	39 0
41 Mantlopetlope	39
42 Thuto ya Mahala	40 0
43 Sefikantswe sa ga Moswi Tautona Seretse Khama	41
44 Ditlhopho tsa Polotiki	42
45 Kaloso ya Bobedi ya Barutabana - M.C.E. 1989	43
46 Dikgoro tsa Morago	44

KGOSI MONARE RABASHA-A-GABORONE

Batswana betsho nkadimang ditsebe,
Kana ke bula letlole, ke boka kgosi,
Ntswe-tshipi le paletseng banna,
Kana banna ba lekile ka natla,
Sebe sa phiri e le nnete
Ya ga Monare-a-Gaborone.

E ne ya baba gareng ga bone,
Ba mo ila lebekebeke motseng,
Ka tota a ne a sa rate boithatelo,
Kwa boswaa-peba kwa go se nang mogolo le monnye,
Go se nang le ngwana a letse a a kgwa letsele,
Morole o mosesane o rata go ipela phetelela.

O ipela ka o ne o re ke gone ke gone,
Motseng go saila tshimanyana e kgopo,
Kalofo e le sefitlholo le selalelo,
Tsa bosigo di sa bolelwe e le nyabese,
Borasemangmang ba fetogile bodimo ba sa umakwe,
Tlokweg a senyega le penne!

O tshware ka natla morwa Gaborone,
Motho re mmolela a sule, e seng a tshela a sa hema,
Ka o ka tloga a ipela phetelela,
Tsa gago di sa le pitseng, di molelo,
Mogang di folang di tla tsholwa go jewa,
Gola o nne kana ka tlou, thakadu.

Ngwaga wa 1976 o a tlotlega,
Ka o re tletse moriti letsatsing,
Moriti motshabela ba lapileng,
Tlhokomologa dipuo le ditshele,

Ka bantlhoi ba seke ba feta banthati, e bile go twe;
Montsamaisa bosigo re mo leboga bo sele.

Re tlaa go leboga le tlhabile,
Ka o tsisitse thitibalo motseng,
Metsi jaanong a ikgatile,
Tlhatlharuane e fetile, e fedile,
Tsa gago re di bone morena,
A "ina la gago le tlotlomale.

MOLEFI SEGOKGO (RRE)

Kgakalakgakala kgotleng ya Batshweneng,
Go belegwe ba banna ba le bane,
Go belegwe Keletso, Boikhutso le Bajibatsile,
Molefi Motlokwaosele a ba sala morago,
Boraro jwa pele bo tshabetse lefatshe leno,
Bo tshabetse tsa lefatshe leno jwa fitlha 'tlhogo,
Molefi ke Mmamphorotlho legong la 'kgotla,
Motho o ka re phorotlho makwete a tloga,
Makwete a kgomo tsa mašibitswane,
Konoono ya re ba di ja ba seka ba di fetsa,
Ga a ipona tsapa go akgega ka tsa 'a bo,
Boora-Segokgo o ba diretse ka botlalo a le pelonamagadi,
Ga a re ke esi fela ke ka tshabela kae,
O dirile ka lorato 'itlho lengwe le tshabelwa ke dilabe,
Merero ya Boora-Segokgo a e dira ka lorato le kagiso,
Kgannyeng tsa manyalo o ne a ntse a le teng,
O ba rutile popagano le kagisanyo,
Phifadu e tshwailwe letseketlane,
E gata e nanabetsa ka mabela,
Go gata ga yone go a e rona,
Tlogatloga e tloga gale,

O bopile ditshumu tsa mmopa bonyaneng,
O godile wa tswa modisa le molemi,
O tsene meepo le mbeponyana wa e henena,
O tsene go tswa Theeti-deep go ya Milside,
Peke le kepu di itse dinonono tsa gago,
'Foko la Modimo o sa le lebala, o ntse o ruta bontsi,
Rapela Ramasedi moruti 'tshaba se tshele,
Gola o tlhogole Motshweneng o nne kana ka tlou.

TAUTONA DR QUETT K. MASIRE

E ya re ke bua ke rate ke reediwa,
Lwa nkadima ditsebe ka duma jaaka botlolo,
Ka ke itse ke bua ke sa okaoke,
Ke bua ke phantsha ke sa kakobe nnete,
Ka tota go ošaoša e le ga basimane,
Basimane ba tshameka kganti-konkolodi!
Ke raya ke bua ka e khukhu e e maoto a ditshipi,
Ke kurutla ka phalafala yo o Mokgalo-o-thebe,
Motho yo mokhutshwane o mpone ke tsamaya kae,
E khukwa e e paletseng mopalo 'ngwaga di tshela,
Quett Ketumile wa ga Masire,
Lo se mmone bosesane phalafala e e maoto a ditshipi,
Ka maboko o belege 'tshaba sa Botswana,
O se sikere magetleng o henena ka sona,
Mafulo a kgothegile o lekela tennyanateng,
Le masigo Barwa-Khunou ba itshegela lemipi,
Diphilo ba di ja ba sa di refolelwa ke ope,
O kgalema gangwe fela ka ponyo ya leitlho morwa Masire,
Ke tau, ke e tona gareng ga tsona tsotlhe,
Quett Ketumile ene Joni wa ga Masire,
Lo bone a lere mathulelo a diterena,
Rakhuna le ene re sa mo le bale,

Ditiro ke ka di balolla lo a di itse
Ka tsone motho wa ga Masire o tlhpile,
O tlhpile o ntse montlenyana.

MOETI-A-SEDUMEDI-A-MATLALA-A GABORONE

Ka jeno letsatsi ba GaNkwenyana re itumetse,
'Kwena tsa dipelo ke raya gore di rumaruma fela,
Di a rumaruma kana go a bo go gaotse modingwana,
Ke kwalata ke leruarua le marapo a motia,
Motho yo Moeti lo mmone ke kgorwane o a thubega.

Mošaweng a Matlala a Gaborone go bonwe mokotedi,
Ke mokotedi o kotela maradu a Matlala-A-Gaborone,
Thokwa e tiba ka tlhako e boka dintsi,
Ka go rialo ke raya kana e kgalema boatla,
Le maralokong, Moeti o sale a itshupile.

Gobalabala ga ngwana ga se botlhale betsho,
Ke okola fela e sere ka moso lwa nkgolega,
Lwa nkgolega lwa re motho o tshwarwa ka mafoko,
Tlhaba ka lonaka motho wa ga Gaborone,
Alola bolalome le bohula lwapeng la ga rraago.

'Foko ke le morwa Gaborone, moroka o sita ka leru,
Direla ba GaNkwenyana o ipetlele ditsela;
Moremogolo go betlwa wa taola, wa motho o a ipetla,
Ema ka dinao o tlhotlhome le motse morena,
Tsena mekhukhu le dikhutlwana o age motse.

'Poo e thata ka melala o le beye pelong,
Motse one o ile morwa Gaborone itome sankatle;

Dirisa morafe wa gago dikokomana di tsoge di etsa,
Fela o bone 'mao tse di ntlha pedi gareng ga bone,
Gobalabala ga ngwana ga se go itse puo, ga ke mafoko mantsi,
Gola o nne kana ka tlou morwa motho.

NELSON MANDELA

Ntwa e tsene motlhabani ga a latlhe segai le thebe,
Barena ba dikgaga monna o nna nabo moriting,
Gareng ga sesi o a kgalema a kgemethe 'tsatsi le tlhabe,
O runya diolong a kgakgathise lentswe mo khuting,
A palele tsotlhe diteko a tebile.

Moseka phofu ya bo ga tshabe go swa lentswe,
O poruma a thitse mofufutso, a we ka sekota
'Tau di mo gagautlhe di mo ngathe dirope,
Monate le botlhoko a di jele felong go le gongwe,
A gane nnang ya banyana go twe o rekwa ka ponto.

Borwa jwa Aferika re bone mogale,
Ngwana a mmala wa sebilo yo o marapo a thata,
Maburu ba rile ba a mmapola a le supa ka monwana,
A re, ka monna a ntsetse go ineela go ne ke maithamako.
Bogolo lo ka nkgolola ke tshela ga ya kae.

Thokwa e pateletswe sengomeng e raga badisa,
E roba dijokwe pholo e mongala e-gana go thapa,
Morwa Mandela o tswaletswe logageng lo le lefifi,
Ka leina teronko, ba re (Robben Island) ke motse,
Segagane se mo wetse gone tlhogong a sa okaoke.

Merogolwana ya tsatsing e kgonwa ke go lela e lebaganye,
Ba thari e ntsho ba rile a dipuisanyo di nne teng go buisanwe,

Bokamoso jwa lefatshe ba bo lekodisanye le barwa khunou ka mmala,

Barwa phiri ba re seo e ka nna botubi jwa nta ya tlhogo,
Ba ikanya go swa go na le go ineela bonneteng.

Meno masweu a bolaya a tshega,
Ma-Aferika ntwana jaanong e lowa ke bone ba le bosi
Malatswathipa a teng a dule Maburu dinao,
Tlotlo ba e filweng ba utlwisitswe monate wa tsina,
E ba rekisitse lefatshe ka bogagaru setshabeng.

Moamoga tshwene lerutlwa o e lebatsa ka mogwang,
Mokalobe o segetse dikgosi sephatlo sa akere mo tshimong,
Merafe jaanong e itaana ka noga e utlwa go lwela molelwane,
Tlhotlho legolo o le dirile ka bomo ka moatlapedi ga a se,
A itse fa ba dipelo di lolea ba tla iphisa dinao go ya go ile.

Monna o nkgang o nkgale le ditsagagwe,
Dithata tsa bantsho Maburu a di akola a itebetse,
Mekoti ba e falautlha ba thugwe ke matlapa ba sa imone,
Ba tswe batlhanka ba kgaphe sethitho kgapetsa-kgapetsa,
Ba fele e le balema thite, di fulwa ba fiwe dikota.

Dilo tse maranyane maitsewe ke beng
Tota monwana ga o ke o itshupa le leitho ga le ipone,
Ditlhaselo di diragalang molato o bewa A.N.C.,
E ntswa sebe sa phiri e le tlhaolele ya mogateledi,
E le yone letlhabego le sa timogeng pelong tsa batho.

MOTSOFE

Matla a me a setse a fedile,
Botlhaga jwa me bo tsamaile,

Bophepa jwa me bo iketse
Bokau le jone bo itsamaetse.

Ke kile ka bo ke le majato
Tiro ke e dira go se molato,
Ke ne ke le mosimane wa phetakapejana,
Modikologa o ja pholo fa lepotlapotla le eja potsanyane

Phatsimo ya marang e nyeletse,
Letsatsi ka seno sebaka le mphirimeletse,
Le dikala tsa me di ntatlhile,
Bana ba me lenga la seloko le ba fitlhile.

Ke kailakaila esi mo motseng
Bana ba motse ba mpitsa 'lo mmotseng.'
Motseng ke letshwenyo jaaka tsitsiri
Ke dule mokopi, ke rata batho jaaka ntsi.

Mpheetšhane wa me o sale a kgaogile,
Matlho a ntse letobo fela e bile ke ngalogile,
Badimo ba me ba ka mpiletsa go bone,
Ka ya go itapolosa logaeng lwa bone.

Ke tlhagoletse mookana wa ntlhaba,
Ke ruile maseana a itshema ba ntshaba,
Logaeng ba fudugile ba re ke kgwanyape,
Felo ba go nnang ga twe ba akola mamepe.

KHUTSANA

Le jaanong ke sale pelobotlhoko,
Le jaanong ke sa itewa ke ditshikaro,
Bohutsana nna kana ga ke bo rate,

Bo mmatame fela ke sa itebetse bonyaneng,
Kana ke lobadi lwa sennelaruri,
Ka re ke mmala, le tladikaka letso lotlhe.

Motlapele o rile, Leina lebe seromo,
Leina la me le maswe, seromo,
Khutsafalo! Batsadi ba me, lo ne lo mpiletsang jalo?
Khutsafalo! kana nna 'ina le ga ke le rate,
Ga ke le rate tota ga le nkgatlhe,
Ga le nkgatlhe le inneelega direng tsa me.

Ditsala tsa me dibabatsane, di a baba,
Ditsala tsa me dipateng ba nkgata fela,
Ba nkgata fela ka ba itse ke se na mmueledi,
Dithutong morutabana o mphile mainaina,
Ke bidiwa segwagwa, ke bidiwa letlametlo,
Matlhogole wa go tsaya tsela ya ba ba ileng.

O se tshege yo o oleng mareledi a sa le pele,
Morojana o mosesane o sa le leetong,
O mpotse tsa kwa ke tswang, ke go yang ga ke itse,
Loso thetele, lerumo je le nang le metsu
'Rumo leo ga le tlhaole baji le bahumanegi.

Legodimo le ka bo le na le maroba ka bona,
Maroba a ka bo a le teng ka latlhela bofofu,
Boikotlhao ngwana wa morago,
Ka seno sebaka ke batlang lefatsheng,
Batsadi ba me ba ntshabetse ba itapolositse,
Batsadi ba me lo ntlogeletse morwalo magetleng.

Botshelo jwa me bo humanegile fela thata,
Botshelo jwa me kana bo mošampa,
Ditshika tsa me di tlhotlhoregile tsotlhe,
Matlhare a me a ile le phefo ya mariga otlhe,

Ke monokega esi jaaka tlhware lefatsheng,
Ke kalaotega jaaka potsane mabapi le botshelo.

Khutsana molao ke o tsaya thothobolong,
Khutsana ke dirisiwa moletse wa namane,
Morafe ke nnang nao wa re ke tsoga ke le mookana,
Mookana, ke ba tlhaba ke phunyeletsa,
Moatlapedi kana ga a še, sa me sengwe fela, ke a ša,
'Itlho le le lengwe 'tshabelelwa ke dilabe.

MOITHUTI

Thuto namane e tona kalosa ditšhaba
Mafura a lefatshe a boswaotshwere,
Boswa o sa kakeng wa bo amogwa ke motho,
Ke naya moithuti kgakololo lo tlhwaeng tsebe,
Le fa go na le maotwana funyela,
O kgobe kgetse o nne ka tsholofelo,
O nne ka tsholofelo ya serwalo sa phenyo
Thuto ke korone e tshegetsa leina,
Lofufa lo apeetswe le lentswe
Lentswe la butswa losi, 'fufa lwa sala,
Bonkete ba ka kgwa manga ba go bona,
Menomasweu one a go obamela e ka re ba go rata,
Meriting sešabo sa kgang e le wena,
Go ja ga go ratannwe o itse
O tlhokomologe ditshebo le ditshele,
E re le tlhaba o tsoge o thubile kobo segole,
Mosele wa pula one o etswa go sale gale,
Ka go rialo o tshware phage ka mangana,
Ka dinao moithuti ema o tlabane le dithuto,
Maotlana ka jalo o tlaa tsoga o a fepa,
Thuto ke namane e tona kalosa ditšhaba,
Ka thuto o tlaa tshubela ditšhaba.

BAGALE BA AFERIKA

Ga utlwala 'kodu teng ga logaga, Aferika,
Kodu tsa tetemisa lefatshe, la ema ka dinao,
Go gala ga tlala le mekgwatha mono Aferika,
Tshukudu tsa porotla, leratla la tswa dikgweng,
Barwa Aferika jokwe ya bokolone sebe, ba e itatola.

Moseka phofu ya 'abo ga a tshabe go swa lentswe,
Tshimega di nne fela ke ka di bala ka maina fa ke rata,
Kwa Ghana, Nkurumah a kgalema go sa itebetswe,
Mzee wa ga Kenyata letlhogo tshweu, kodu ya bobora,
Nyerere le Obote ba tsenya ditlhogo ba ngunanguna.

Ke dikwalata, matlapa a sennela ruri,
Lwa mogolo se sa feleng, ba lo diragaditse,
Puso ya bokolone lemena, ba e emela ka dinao,
Go galaotega ba go ikanya go leta dira,
Go leta dingwe dira di mariri e se diphiri.

Ba segile mosako, ba thadile motheo,
Bagogi ba ka jeno lesego ke leo lo atleng,
Lo atleng kana tlhako ya morago e etsa ya pele,
Bakgalajwe matsapa ba a tsereng ke lorato,
Ke lorato lwa 'fatshe lwa bone Aferika.

Poo di nne di botlhaba jwa Aferika,
Poo di mmala mongwe fela ga di gake,
Di mmala mongwe fela o montsho,
Ke tsetse ene ga a tshwane le ke otlile,
Aferika 'fatshe lwa bone 'tlhago, e seng ka dipampiri le theko.

MOTSADI

Ntshwarelang Ntshwenfatshwa ke game,
Ke tsenye tlhogo ke gamele mongwe motho,
Ke raya ke gamela motsadi ke dira ditebogo,
Ba pele lo sale lo boletse, ya lona ke rumo le nnela ruri,
Ke raya ka lo rile, motsadi wa motho modimo wa 'gwe,
Motsadi tlotella ya phenyo e a go tshwanela,
Melapo le dikhuti ke di tshedileng, ke ka wena,
Maganong a malau go itse wena ka o nkemetse,
O nkogotse ka la mmangwana a e tshwara ka fa bogaleng.

Lore lo ojwa le sale metsi,
Lwa gago o sale o le obile gale,
Efangedi ya diphuthogo, Bo-kgaoalo seven o kgalemile o sa
lape,
Sekolo sa Bo-bashi sone wa se kaya e le botlhodi setshabeng,
Mapantsola one wa a kaya a a ja sereto ditlhodi,
Mosimanyana ke go tlhwaetse tsebe ka a utlwalela,
Magang a lorato ka a tlhwaela tsebe, ka a utlwalela,
Tseleng tsa bobaba o mphapositse go tsena ka lorato,
Ka jeno ke bua la montsamaisa bosigo ka matshwanedi ke sa
bonye.

Dipaka e ka bo e le tsele tsa maloba,
Dipaka tota e ka bo e le tsa kgakgalane,
Ke ne ke tla bua mangwe mafoko ke a itse,
Ke gwetlha motsadi ka e le ene modiradilo,
Ke ka bo ke bolela fa go nwa ka galase go lapisitse,
Ke bua ke gwetlha mafoko, gore a emelele,
A emelele a ye go batla sego sa metsi,
Motsadi wetsho o ganeditse la ba pele, moremogolo,
Wena o mpetlile e bile ke tshwanela nyalo ya le penne.

PULA

Kgomo etsho tshwaana e a dusa
E rwele mohungwana mpeng,
Kgatsele bolepelepe, re tloga re e akola,
Madila bophadiphadi botlhogoputswa ba tshela makuka,
Tshwaana etsho madira-dintle, madira-dibe,
O nne teng, batho re famole dinko,
O feele lenao fatsheng leno, re lelale magodimo,
Re re; 'moeng goroga dijo di bonale',
Goroga, photla le moitshopare re di akole,
O ka thothoketsa lefatshe ka kodu ya gago,
Wena ponesetsa-ditšhaba, o sa lopiwa ke ope,
Motsing o gorogileng re sala re tshwere melomo,
Re akabetse re lebetse fa re ntse re bitsa Rara,
Ka o a bo o lerile kgora lefatsheng,
Baheitane ya bone tebogo ke e sele,
Ya bone ke e sele, ba go bitsa; 'o a bo o tlile',
Ditlaagana le mekhukhu tsone ga o di lebele,
Ga o di lebele o thukutha o tlhole bolalome,
Morakeng 'pelesa ke dikwalata,
Roilane badisa ba e gama mmoeletsa,
Pula kgomo tshwaana tshampela ya mawatle!

LEUBA

Legodimo le ka bo le na le dilotlolo ra bula,
Legodimo le ka bo le na le mogala ra letsa,
Batho re ne re ka kgona ra bua le Modimo,
Re ne re ka kgona ra mo itsise 'lelo tsa rona fatsheng,
Le tsa rona 'keledi a ba a di bona.

Tlholego 'ana e matswakabele e le ruri!
Tlholego kana ga e pelotlhomogi e le ruri!
Motlheng wa leuba mala re gamela sesaneng,
Botshelo bo nna le maretshwa bo tsietse,
Botshelo bo mela dinaka bo tlhabe go gaisa mitlwa.

Ke raleitse lefatshe maloba ke ya bokone,
Go tswa borwa go ya bokone ke bone dikgolo,
Lebopo lotlhe le lela sa khuranyo ya meno,
Polelo e le, Ramasedi o kae ka marothodi,
Marothodi re bone botshelo, re mo obamele?

Gareng ga dipoa go nka gore phuu!
Gareng ga dipoa go rena dikodu ka mefuta,
Goora-nong go jewa go be go tlogelwa,
Bagolo botlhalerwa ba leba fela ka matlho ba feta;
Modimo o o nko e metsi, masalela a sita palo nageng.

Ledimo ke wena o sa kgaotseng o re leretse bojwese,
Ledimo ke wena o intshitse kgogolammoko,
Kgogolammoko kana e gogola mmoko le malele otlhe,
O gogotse matlhare a lenaga otlhe,
Lenko la gago le thebathebisa sebete ka dififi tsa diphologolo.

Mphe-mphe e ya lapisa, motho o kgonwa ke sa gagwe,
Leubeng re dule bakopi rotlhe go sena mofi,
Go oba letsogo re go bona golo gongwe kgakala,
Go ja go akola Bomankge, ka ba re fora ka ditsiabadimo,
Ba re fora ba re ba ka nesa pula raja ra kgora ra lebala.

Ga tsalwa ngwana esi malwapeng otlhe,
Ya nna Tsholofelo a sa tlabise ditlhong,
Letsatsi la tswa la ba la phirima,
Ngwaga legonnyana ya robega kgothu!
Letsatsi la o re gopola Modimo, le rona re tla tshega.

LORATO

Lorato lo a tsentsha lo isa le naga,
Lorato lo mašetla lo isa banna bokgwelwa,
Ke mpho ya Modimo ga e rutwe,
Motho a na le lorato o ša matswalo,
Phologotswana ya sefofu e e sa boneng,
E falautlha fela mo lefaufaung,
Selo se lorato lo roba ditokololo,
Thata e a fela motho a itshele 'keledi,
A itshele 'keledi a gopotse wa gagwe moratwa,
Kalafi ya botlhoko tlhora-boroko,
Lorato kgomogadi e e gangwang ke botlhe,
E gangwa ke marena le malata ka go tshwana,
E gangwe ke tshadi le nona go tshwanele,
Ke thetele ga e na mokgoni,
E oba dithata tsa bagale bonolo,
Ke lone le ntshisitseng Samson sephiri a itebetse,
Ke lentswetshipi le le paletseng tsothe dioka.
Lorato lwa sennela ruri ga se lwa madi,
Lwa boammaaruri le gokaganya baitlhoki,
Papadi ba e beele kgakala,
Ke kopanya ditšhaba ya baji le bo-esemang,
Semorafe mo loratong ga se tsene,
Mopotokise le lekgoa ba atlana go tshwanela,
Lo tsenya ditlhabi motho a lealeege,
A tlhotlhome le dikgaolo a batla lorato,
A sasankege ka go twe mmatla kgwana.

LOSO

Loso kgogomodumo lekometsa batho,
Loso kgogomodumo lemetsa-bannye le bagolo,

Dimo o jeleng bonkoko le borremogolo,
Dimo yo a sekeng a kgora go metsa,
Kana nna ruri loso ke a lo tshaba ga lo mmala,
Ke lo bina boatla, ka lo se na mokgwasa le fa e le pono.

Segatthamela masisi se sa tshabeng lesea,
Segatthamela-direng ga lo tlotle botshosoerweleng,
Le tautona loso kana ga lo e kakobe,
Le mobisopo loso ga lo re o direla Modimo,
Bobelotlhomogi jone ga se jwa lone,
Tlhagiso, maithamako, ga se ga lone.

Mogala o ka bo o le teng o ya legodimong,
Mogala o ka bo o le teng ka botsa Ramasedi,
Ramasedi ka mmotsa gore la me letsatsi ke lefe,
Ramasedi a ntlhagisa ka nna ke bofile morwalo,
Tota ke ne ke ka akola mafura a lefatshe,
Ruri ka le aramela le sa ntlhabetse lefatsheng.

Lediba le se nang bodikologo leja batho,
Khuti e se nang bokatelo lekometsa batho,
Bana ba ga rre ba seyong ba feletse fa,
Matlhape a kgosing a seyong a tsene fa,
Ntlha e kete tlhong yone o e latlheletse dintsa.

Taugadi e paletseng 'tsholo le bolotse,
Le dinako ka re kgogodi ga o di tlhaole,
Bosigogare masigo a kgaogana o pataganya fela,
Pelo ya gago e gwaletse lentswe-tshipi,
Pelo ya gago thetele nama ya tlhogo.

KGARURU YA DINTSHO

Metlha ga e sale e le ya maloba,
Setso sa Batswana se sa phaphasela godimo,
Gompiano dilo di fetogile botshelong,
Sekgele se ba dule diatleng ba iphotlhere,
Diaba di diragalang o ka re petso ya badimo.

Ke eng se se dirang Katse le legotlo go nna mmogo,
Fa malwapa a farologana ka maikutlo metlheng ya dilelo?
Ke eng Nkete a itumela ka boipelo,
Ntswa ntlha e nngwe Khumagadi e lela sa ga Ragele?

Dilo tse ruri mathata ditsia-badimo,
Bogologolo loso lo ne lo iwa ka tshisibalo,
Difatlhego di tutetse, bosesetla e le jwa kutlobotlhoko,
Moswi o ne a sa lwelwe go se magogegoge.

Moyakgotla ga a ke a lelekwa,
Kgotla la ditsheko jaanong ke la dintsho,
Makgamu a lema dinaka a re, moswi ke wa rona,
Ba re ke wa bone o fitlwa kwa kgotleng ya bone.

Maloba mosadi o ne a fitlha monna a mo okile,
Tshwanelo e nne ya boora-monna fa a sa mo oka,
Metlheng eno batho re poruma re lebale molao,
Go nna dikgakgamatso dikgaga di remana ka matlapa.

E anywang e leletse e ruta e e mo maleng,
Tlhako ya morago e gata fa ya pele e gatileng teng,
Malatsi ga se a maloba maje a sa ntse a tobetsega,
Bana ba seša bakanoki ba ela dilo tlhoko.

Batsadi ba rona tlhapang diatla lo nne phepa,
Lo kgweng lo tshelele, selo se botubi bo a re senya,
'Fatshe le ka ya tshwenyegong baša ba tsoga ba lo etsa,
Makgapha a tloge a fiwe leina gotwe ke ngwao.

TLOLO MOLAO - GABORONE

Mabutswa pele molao lo o tlhomile,
Lo o tlhomile molao gore re lo etse,
Re tsee malebela re tswe 'tlhako tsa morago,
Re tswe tlhako tsa morago ka di etsa tsa pele,
Lo rile susu ilela suswana, gore suswana a go ilele,
A dilo di dirwe ka iketlo go kgobilwe kgetse,
Re gate ka go nanabetsa a dilo di nne ka tolamo,
Thakatlhakano e teng ke ya bannye le bagolo,
Bagolo le bana ba o ntse ka marago molao,
Dilo di diragalang ga di jese di welang,
Di nwetse nwe! mo ditlhaloganyong,
Ke tsene Gaborone maloba ka akabala,
Nna le tshadi ba fetogile, makgoa a ba hemetse,
Bagolo ba a tlotlwa, mahiphi a bewa marago,
Ano malatsi ke a sele, motsadi ke yo o go belegeng,
Ngwana lenga o le kgwa bonolo ka tshosologo,
'Foko la bone ke le 'Ga se bogologolo'.

POPAPOPA E A IPOPAGANYETSA

Nna fa ke rata nka ntsha khudu legapeng
Selo go tweng bokolone bolalome
Puso ya ga Mmamosadinyana selalome,
Selalome se feditseng Batswana motswaketsa.
Kgosi tsa rona dikgori ga di bone

Ke bo-kgori, ba bone mae lorapo ba sa le bone.
 Pusong ya ga Mmamosadinyana ba e ineetse fela
 Ba e ineetse fela e ntswa e sa tswe dipe.
 Legoeleleng a re tlogetseng nalo le fedile
 Pusong ya ga Mmamosadinyana go ne go le lolea
 Ntlha ke fano jaanong dihlabololo re a di bona,
 Ntlha jaanong di runya pusong ya barwa Aferika!
 Se a re go tlogelwa tsatsing se ikise moriting
 Banna ba gaetsho, go fela lobelo thota e sale
 Le le fitlha tlhogo re tla lo gopola
 Paka tseno ga re gatise menwana
 Malatsi ano dikole ke ntletsentletse
 Botautona ba goroga re tsenwa ke phefo.
 Ka dithata tsa lona lo agile lefatshe
 Popapopa e a ipopaganyetsa,
 Phatlaphatla e a iphatlalaletsa.

MAIKUTLO A ME A LETSATSILEO

Mosimanyana ke fano ke tlhomogile
 Marang a letsatsi a tlhabile;
 Lefifi la ntshwarele-ngwana le khutile.
 Mmatla kgwana o nna a kalotse,
 Ka a itse gore mphe-mphe e ya lapisa.
 Nakokgolo ke fatafata sekokwana,
 Ka leo letsatsi ke ne ke fetogile tshimega
 Ke gata ke ronoka jaaka tshwene,
 Phifalo ya letsatsi e apogile go bonala.
 Tlhakole a roba bobedi 1988 'tsatsi la phenyo
 Kabelo tsa Batlapele ka lone di senogile,
 Go tlhaga ga ngwedi kgale ke go letile.
 Ke sala ke wa ke e tla ke tsoga ka lobaka
 Se a re go tlogelwa tsatsing se ikise moriting,

Ntsho thuto ke e senkile ka tlhohlhoma fatshe leno.
Thuto-potlana ke e bone ka lona Badimo ba me,
Ka leo letsatsi maikutlo e ne e le a maša
E le a masa kgoro ke tsena ka ya sekolo
Sekolo sa borutabana, ba re ke sone M.C.E.

MORAKANA MOŠA, GA O LAPISE

Ke utlwile ka batsaamolelo
Ba re, rra tlhokomela ntlo e jewa ke motlhwa,
Sekukuni kana se bonwa ke sebatladi,
Mosadi nna kana o nneile mokwatla
Lorato lwa gagwe go nna lo tsididi,
Ditiro o di dirang ga di kgatlhise
Mosadi o inama a ikantse mosese wa morago
Borokgwe bo mo kgathileng a bo a bo tshepile.
Bagolo ba me ke kopa dikgakololo
Thusang ka dikgakololo, kana lo boletse,
Lo boletse lwa re matlhogole rokela banneng
Rokela banneng e re 'dibo se tlala ba go thuse
Ke bone sebatladi se tla go ntoma tsebe,
Se ntoma tsebe se re, 'Rra tlhokomela!
Mogatso o agile motse wa bosigo,
O agile motse wa bosigo pateng'.
Mmamotse boela gae ke a go rapela,
Ga re more wa mafoko ke go a bua
Mosadi wa me phiri e gagolakang
Le legae ga a le gopole
Ga a le gopole, morakana moša ga o lapise.

SALA SENTLE MORATIWA

Nthebolang ke imolole pelo ya me
Makgoa bakanoki ba etse dilo tlhoko
Selo se lorato ga lo bone, ba lo etse tlhoko
E re go karaganya o je tlhale
O je tlhale o lo tlhalefe lo na le maretshwa.
'Sigo jwa maabane nna ga ke a bo bona
'Sigo joo bo makgapha ruri ga ke a ya dikgofeng
Ga ke a bo bona, kana o ile mafisa
Pelo ya me e galaka botlhoko le jaanong,
Mafoko ke a reilweng pherere tlhoka-bojeo.
Ke sale maibing a ditaelo
Pelo pholwana e a ipofelwa,
Tlhagiso o mphileng yona ke e tlhokomologile
Moipolai kana ga a lelelwe ka a ithadile thipa mpeng
Mafoko a kana a nkiteisa ditshikare,
'Se sa feleng se a bo se tlhola'
Ao moratiwa!, o bua jang fa o rialo?
Foko ja bofelo pasela, 'Sala sentle moratiwa'.

MMUALEBE

Bagolo betsho ke a dumedisa
Go balabala ga ngwana ga se botlhale
Ngwana a dumedisa ga botse bagolo matsogo
Mafoko a kgotla mantle otlhe.
Ke ne ke latlhela tlhware legonyana go tlhagisa
Metlheng eno bagolo ga ba sa šomelwa
Metlheng eno bomalome ga ba ntshetswe ditlhogo
Malatsi ga se a maloba lefatshe le tobetsega,
Malatsi ano ke a sele a tshwanologo!

Ke ka rothisa mmutla madi, ka di ntsha
 Basa e bile lwa re ke phitlhela kgomo ya serotswana
 Malatsi ano tlhalo ga se sepe,
 Malatsi ano lo roba bana ba batho motlhofo
 Molao lo o gatakile ka dinao, 'kgotla ga lo di tshabe
 'Kgosi lo di lebatsa molao ka pipamolomo
 Kgotla-tshekelo lo ikanye bomaitsegobua
 Bonkgata-ke-tlhaname lo ba reile maina 'Diagente'
 Diteme borethe e ka re tsa noga
 Mahube a naka tsa kgomo lo utlwa a bolelwa
 Letsatsi le lo fisa pharagatlha tsa marago,
 Malatsi ano ruri ke a sele ga se a maloba!
 Madiso go setse leina, ditshunyana tsa borre di ile
 'Tshunyana tsa borre di ile le dikgwa.
 Go balabala ga ngwana ga se bothale bagolo,
 Ke ne ke latlhela tlhare logonyana
 Kana motlapele o rile mmualebe . . .

BOEMEDI JWA PALAMENTE

Go tsile namane e tona polotiki
 Go medile 'tlhare se leele se lejwa ke botlhe
 Kgongwana e tlhagile e tserema ka sebalalo
 E kgaoditse tidimalo ya Batswana ntlheng tsotlhe
 E dikile e tswa moseja khunwana ya makgwiwa ke lewatle

Re bone morwa Khama a tla a e gateletse
 A kgalema a re 'Batswana thusang re tle re ithuele'
 Re ithuele tsa rona ditshunyana re nwe lebeso
 Mong wa thipa ga ke mo lebele, ke lebala mmesi
 Mapalamente itseng fa lo tlhophilwe go tswa babueledi

Tiro lo e dirang ga se tlotlo ke botlhanka
Beng ba tlotlo ba teng, kana ke raya dikgosi
Lo tsweng batlhanka lo direle merafe
Dingongorego tsa bone lo di bege tautona a di itse
A di itse kana ga twe; kgosi thothobolo e olelwa matlakala

Monna o nkgang o nkgang le ditsagagwe
Go sa nneng jalo lo se ye palamenteng
Lo se ye palamenteng mathata re a ise dikgotleng
Boemedi jwa lona bo kitlane e nne jwa sennela ruri
Noka e tlatswa ke dinokana, phuthang megopolo merafeng.

Motho kgole ya pula, o bošwa a bofologa
Maitlamo a lona lo a diragatse e se nne maitlomo
Merafe le lona mmang ke lo tlhagise
Motho noga, o tsamaya ka mpa
Ditshwanelo ba di newe, ka tsie e fofa ka moswang.

MOLEPOLOLE COLLEGE OF EDUCATION (M.C.E)

Ke tsamaile lefatshe leno ka bophara
Ka kgabatlolega nalo ke latlhela bofoku.
Kana ga twe matlho dialana,
Matlho dialana ga a jele ope sepe.
Koko go tlotloma le mathudi e a bo e sa itire,
Ke tsene dithota le dithotana ke batla lesedi
Ke kalaotega phisego e le ya patlo ya lesedi
Lesedi ponesetsa bannye le bagolo.
Setlomo se phatsima fatsheng la Bakwena
Phatsimo ya sone e ka re moengele,
Tshetlhana ka e bona e bothile Borakalalo
Leradu le gangwang ke Batswana botlhe

E akgisa thele e letile badisa go e gama,
Ke tsere mekao ka e iketlela,
Ka e iketlela ka tsenya tlhogo tlase ga yone.
Ba e file leina nna lo a mpalela
Lo a mpalela le gale ke tlaa leka fela
Molepolole College of Education, e kete ba rialo,
Thanolo ke gore, Sekolo sa katisetso borutabana.

KAGO YA LEBALA LEGOLO LA METSHAMEKO

Motswana yo o matlho a bogale a bone
A tsose tlhogo a gadime botlhaba jwa Gaborone
Fa e le yo o matlho a boroko a itlhoboge
A tsee difelekekere a lebe
Ka ke gone a ka bonang sentle

Botlhaba jwa motsemogolo go senyegile
Batswana ba a tlhapa ba nna basetlhana
Ba tlosa sekgobo se ba emeng pele
Marokgwe a golediwa kgapetsakgapetsa
Mathata ke diatla di sa tsweng dikgetseng

Diatla di sa tsweng di tlhotlhora dikgetse
Puo ke; 'a re ipelegeng Batswana'
Kana T.A.I.C.U le yone e tlhakaladitse
Ka re kgopa di kgopne 'fatsheng leno
Boipuso mojeng, setediamo molemeng

Mokoduwe go tsosiwa o o itekang
Lebala legolo ke leo Batswana
Magasigasi ke a rona a re se inyatseng
Botsalano jwa rona le mafatshe re bo bone
Re bo bone re sa bo lebele kgakala

Dingwaga tse masome mabedi re ipusa
'Ngwaga tse masome mabedi re itlhabolola
Matshego a mane a re diretseng Batswana
Bo-mme a megolokwane e kurutleng
E kurutle re ikgantshetse mafatshe

Ntšanyana ya maitaasebata e bonwa mabotobotong
Batswana lo dinatla lo sale lo bonetse
E rile go twe motho le motho kgomo lwa dira
Eo e le kgang ya Unibesithi le bokamoso
Boramatla lwa bo beela kgakala lwa itsolopanya.

GABORONE SECONDARY SCHOOL

Khunwana e tiba tlhako Gaborone
E akga mogatla e boka dintsi
Maši a yone a borerepa jwa kgatsele
E fatlhositse bontsi ya ba jesa tlhale
Batšhomi ba re, 'Gaborone Secondary School'
Dikago di motwenene khubung ya Gaborone
Mo go tsone go bonwe matshwititshwiti
Go dule dingaka le diagente
Thuto tsa maranyane le temo ke tlhampi
Bana ba rutwa temo ya merogo
Motshotelo wa dikoko ba o fataka kgapetsa
Logong bana ba lo betla ba le pelonamagadi
Mma-Chandy o ba buela digwagwa
A tshomi marapo ke a ga mma-Sephuma
O ba tlhatlhelela ba ikopele morogo
Ngwaga tse masome mabedi di wetse
G.S.S. o mogolo o feta Botswana
A gago matsalo ke phalane 1965
Mma-Ratsoma o lemositse tlholwe moole
Bana jaanong ba itse boleng jwa Setswana

Khuduthamaga ya matona a puso e a ipela
Maiteko a bone a tlotlometse ka kgarejwana
Kgarejwana ya marata go lejwa - G.S.S.

TSA DITLHAELETSANYO MO BOTSWANA

Rre Mokane o kae a nkadime lentswe
A nkadime la gagwe ke galaotege
Ke setolele Batswana ke di bonang
Ba tle ba se ka ba tsoga ba re ke maselamose
Mapolotiki lo re forile
Ga lo a re 'fatshe leno mpho ya Modimo-kanana
Phokoje go tshela yo o diretsenyana
Ntwa kgolo lo e lole barwarre
Tsa ditlhaeletsanyo phetakapejana
'Tilo sa bogosi se a lo tshwanela
Sebaka gareng ga dikgaolo ga se sepe
Gaborone le Maun ke nko le molomo
Lobatse le Kasane tsone ke a didimala
Tsa dikwalo mediadia tlhotsa-nageng
Thelekerama - rantweesane o teng
Molaetsa o fofa motlhofo ka one
Le phirima gae ba se gerima botlhe
Molaetsa ba o utlwile mongwe a re tlogetse
Tsa lefatshe a di tshabetse go ikhutsa
Motho a le kwa Ennyelane ke dinyana
Maranyane magolo ke, 'Halo - o tsogile jang?'
Dikgang tsa bo-Amerika re di gola fela
Re di gola segautshwane go se thona.

MATLALA SECONDARY SCHOOL

Nna e ya re ke bua ke rate ke reediwa
Ka reediwa ka ke itse ke bua ka nngwe kgarejwana
Kgantshwane sa ba Ga-Nkwenyana, nkwe o apereng
'Matlala Secondary School' ke ka rialo fa ke rata
Ke fetoge ke re sekolo segolwane sa Matlala
Matlala Mmamotlala ka motse
O tletse motse ka tsa gago dikungo
O alositse basimane le basetsana ke batho
Ka jeno letsatsi ke nna le tshadi malapeng
Ba pele lo rile molemo go tsena wa logare
Batshwara marapo ba Matlala ba lo utlwile
Golo koo 'diba sa molao lo mpotse
Bana ba rutwa maitseo ba aloge
Ba itse fa ya mosimane e le e nkgwe
Ya mosetsana yone e le e kgwana
Barutabana tlhwaang tsebe lo utlwe
Lo nne podi matseba dingwe dira di teng
di sesele masigo go robetswe di ya kgosing
Tiro lo e dirang ga di e bone
Ga di e bone le e seng di a lo latofatsa
Go ja ga go ratanelwe lo a itse
Dibabatsane lo di tlhokomologe
Ke bo-montsamaisa bosigo ba ka moso
Lereo ke la tlotlo ke la ga Mmabatho
Ke Matlala, matlala ka motse
Motse mošata wa Batlokwa go mogwe mogale
Botlhaba jwa mosata oo, go bonwa kgongwana
E anywa ke botlhe masiela le dikhutsana
Seboa ke sa masithasilha a thuto
Thuto tsa kapei ke tlhampi Mma Chokwe o di goga pele
Tsa maranyane bo Mma Raseokamo ba teng
'Kolo ga se sa ba Ga-Nkwenyana fela
Ga se sa bone fela, ke sa botlhe.

TAU

Se'o se mariri se rakaletse khuting,
Sebata se kgalema nageng se a porotla,
Lentswe ke lele tebileng ga se la bo šašawane,
Tshetlha ya dikgwa e e jang e kgabetlelele,
Tshimega e tsongwa ke banna ba supile legodimo,
Magatlapa 'tsholong la tau a phura makwati,
Mesoba e tlamelelwa mathekeng ba gomotsa matswalo,
Morakeng morena tau o tsena go tshwanelege,
Marole le mealolelo maloba a fetoge maabane.

Motlhopha ntsi ke yo o kgorang,
Phologolo le motho tshweu-tshwana mo go tau,
E phuraka e kgabetlake go sale lenko la madi,
Letso Loo-phologolo lo mmina boatla,
Lo mo tshaba phetelela ka taolo a e ipeile pele,
A e ipeile pele e le maruding a gagwe,
Kgosi ya lenaga kopelong o tsaya 'ntswe la bofelo,
O ja bogogo a tetemise kodu,
Pilara ya lenaga e kgonwa ke setshedi se le sosi,
Se le sosi fela, ke mmutla ka bonegenege,
Botlhale ga bo na ntlo ya bone ke leruri,
Ka maano mmutla o tsieditse seoka segolo, tau.

KHUMO LE LEHUMA DI LALA MMOGO

Ntheetseng ga ke bue mafoko a bo-gatwe,
Ngwana 'a mmolelelwa a sa utlwe o thanya lo tlhabile.
Khumo mouwane e tsamaya le dinako
E tsamaya le metlha ga e ikanngwe
Ga se lotso lwa sennelaruri e a foforega.

Ga e na nkgakgane e a mo folosa
 E a mo folosa a sale a ribame
 A sale a ribame ka mpa ya sebete fatshe a lela
 Ponelopele le kelelelo di botlhokwa go e somarela.
 Gopane wa moikapari o tlogela mekaše a hume
 Ka lengwe la malatsi a goletse legetla,
 Mahura a tunka mo go one khumo e tlile.
 Khumo le lehuma bo-ntsala
 Ke bobedi bo nkgisanang losika
 Ke bobedi bo tshwaranang ka magetla.
 Khumo ga e tseelwe ditlankana, segwagwa
 E pathaganya fela ntleng le taletso ya ope
 Ntsalaayone lehuma ga le senke le fa e le o mang.
 Dinako ga le di tlhaole mo go lone ke mediadia
 Khumo le lehuma ke barwa mmogo
 Bobedi jo ke dilala mmogo, ba pele ba boletse
 Ba boletse ba re, 'khumo le lehuma di lala mmogo'.

BODUMEDI

Metlha le dipaka di ka bo di laolesega
 Di utlwa dikopo tsa baledi lefatsheng
 Ke ka bo ke butsetsa dipaka tsa kgakgalane
 Ke ka bo ke busetsa tumelo ya goo-Lowe
 Ke busetsa tumelo ya bogologolo ya badimo
 Tumelo ya goo-Lowe bogolo re ka e tokafatsa
 Dingwe re di fetola, ra e tokafatsa
 Ra tlhophla dintle, dimpe ra di latlha
 Lefatsheng re ka bo re nna re kgobile kgetse
 Dintle tsa ya seša ga di dinene lo bone
 Tumelo ya seša madubadube ke mathata
 Papadi e dirwa tempeleng go itebetswe
 Ntsa le mmutla di tshela mmogo ka kagiso

Bokeresete le dipolotiki di nyalanngwe
 Buka ya molao e nna mojang baebela molemeng
 Tumelo ya gompieno motho o a tlhotlhomla
 Motho o a tlhotlhomla a etse koko
 O longwa ke manno a tšhatšhame
 Sebe sa phiri a le letsomong la maemo
 Diphuthego di kgaogana makgamukgamu
 Di itaane ka noga e ntse e utlwa
 Di lebele lefoko la Modimo, 'lo ratane'
 Tumelo ya borre e tsamaetseng ruri!
 Molao ga o sa leyo le mo badumeding
 Mabala a aparwang makgabisa a kgatlha 'ilho
 Tumelo ya goo-Lowe e bopile setšhaba
 E ratile merafe tshisibalo peleng ga bagolo
 Tumelo ya sesa manyebi e makobekobe
 E tlhotlheletse lesuma, go rena tlala lefatsheng.

MOLELO WA MARIGA

Khunou e senang tekane lefatsheng
 Poo e rethakang ka tlhogo go siame
 Ke mogale molwelwa ke bannye le bagolo.
 Ga se magaothane mme e gongwe le gongwe
 Ba maloba nna ke ka lo ganetsa
 Lo rile 'tebele le le kwa ga eno, le kwa ga mme le teng.
 Nna ke ka re poo e e kwa ga eno,
 Le kwa ga etsho e teng.
 'Tlotlo la bahumi le bahumanegi
 O nne teng batho re kalape jaaka dinamane
 O tlhokafale batho re nne dikhudu,
 O kalola ramatheka monna yo mosesane
 Mmabatho moratwa ke ditšhaba
 Poo khunou - molelo wa mariga.

LEBATLA LA BATLOKWA

Kodu ya thakadu e utlwala tennyanateng
Lonaka lo galaotega motsheo ga Ngotwane
Lengwane le poromela boatleng
Pilediwa kana e a lwelwa
Matlhogotshweu ba thelesegetse tseleng
Ba ga nkwenyana o apereng, nkwe ke apere tau
Thakadu kodu e tetesela 'kgotleng
E tetesela kgotleng e bitsa lona
E bitsa lona gore lo mo tshologe mokgosi
Kgosi o epile pitso go bolotsa letsema
Mosele wa pula o etswa go sa le gale
O etswa go sa le gale e sere kgotsa thothi tsa feta
Tiro tsa morafe le tsone a sa di lebala
Mophato wa Thaka-tsa-Marumo o o ntshitse letsholo
A itse fa wa Maaloso o tla o tlhatlhama
Borukutlhi thakadu o supile morafe ka monwana
A re morafe wa me ke lona dilalome
Ke lona dilalome baba lo a ba elama
Ka lentswe a re, mabogo dinku a thebana
Fa lo nkeme nokeng re ka feny.

TSHWENE

Mohurutshe ke fano ke ronege
Tshwene ke naiwa mmele
Makopong ga ke naiwe
Tshwene tulo ke nna ya bogosi
Tulo ke e nnang ga e tlakatlakelwe
Tshimega mhapheng wa lentswe puso ya me
Mantswe ke pitikolola, diphepheng ke metsake

Bore joo tsina monate wa jone ga o umakwe
Ke diphilo 'abe sa rona nnakgolo
Mohurutshe tshimong ke loma pele
Ke tibola letha, mmopo ke loma pele
Tlhorro ke rwala ya segosana
Ga se ya bo-esemang, ke ya bagaka
O sa leleng o swela tharing
Sika loo-motho ga lo rate go ntebela
Kilo lo nkilang ka yone e a boitshega
E njesetsa kgobedung ruri ke a tlhorisega
Letlhoo go nna ba re ke senya masimo.

NNETE

Motho ga a itsewe e se naga o boteng
Ke lediba le sitang mmolelo.
Mafoko a maaka a nna mantsi ga a na palo
Baboledi ba one ke bo-gatwe!
Ke bogopane ba 'teme pedi di maphata,
Modi wa one e ka nna botubi, ga ana tlholego.
Batho re tlhoile nnete, re kobile lefifi,
Se 'o se nnete se babatsana e a baba.
Lenko leo le tshedisetsa batho tlhoregong
Monna o le supa le penne a re, 'ke gone ke gone'.
Nnete o swa nayo e le khupamarama.
Ke kgomo ya letsetse e ganang go gangwa,
Khunwana e mongala e raga bagami.
Bopharameseseng bone e ba ila lebaibai.
Khunwana e gangwa ke monna a ipoditse,
Monna a ipoditse gabedi gararo.
Maraganateng a bana ba mpa nnete e a ba kgaoganya
Bobedi jwa marago botsala bo thujwa ke nnete.
Nnete ga e age le motho, e boima selefika.

THUTO

Thuto motswedi wa botshelo
Thuto motlokolo wa batshedi lefatsheng
Ke lerumo la botshelo kalola mathata
Letlotlo la bannye le bagolo
Matlhogotsweu ba tshela mawatle ka thuto
Maseanyana a tswela matlho dikolong
Metlheng eno thuto selepe sa magagana
Malatsi ano motho o se nang thuto ga se ene sentle
Ka seša thuto go tewa dikwalo
'Tlhale jwa sekgoa bo bewang ka dipampiri
Ba pele lo opile kgomo lonaka ruri ruri
Lo opile kgomo lonaka, lo ojwa lo sale metsi
Ya lona thuto ga e kgaogane le mong
Ga e pakwe ka dikwalo e a peperetla
Maikatlapelo a botshelo one lo a aba
Lo a aba bana ba itse bosula le molemo
Thuto kgojana ya dingwao
Thuto phutha matshelo seoposengwe
E tsere tsa segologolo ya di baya golo gongwe
Ya tsaya tsa seša ya di kopanya natso
Thuto ya borremogolo le ya seša di gata mmogo
Di tsa ngwao ka jeno dikwalong di a tsena
Di a tsena gompieno re itse 'bo-mokobolo' dikwalong
Thuto phaposa mamena, tlhatlosa ditshaba!

MOLOMO

Mmamotia tibela e senang boa
Mogokare wa bannye le bagolo
'Atla tsa mothatiotlhe di bonwa foo
Modira bobbe modira dintle
O lomao lo ntlha pedi totlhanya ditšhaba
Totlhanya ba tswang sebopelong

O tlola dinoka di tletse wena molomo
Wena molomo o mogale o dira ka puo
Magatlapa one o a tsenya Seetebosigo
O tshosa ka mororo, kapesa ka letshoba
Nong di maoto-a-thata di a tlabatlaba
O le buileng, 'ga le phirime'
Ba taboga lepaapa go le dibela
More wa mafoko ke go a bua
Re a bua ka eng fa e se ka molomo
Se'o se kananyana mme se ditirogadi
E a re e tsentse tlhako kgamelong se thuse
Se thuse re buisanye matlho a phage a lebanye
Legapa le setlhoeng sa motho
Le gakatsa melelo e peperetle
Le tima mollo o sale o timile tsho!

KGOROSO YA MOENG

Re letse re bina pina maabane,
Maabane re letse re buswa ke pina,
Bonkoko leotwana la mowa le ba akga,
Borremogolo masego ba mo kata ka one,
Ngwana ga se wa motho ke wa batho,
Bonkgolo ga ba apaya thukhwi le mala,
More ba o palama ka legotlho,
Moeng lwapeng o gorogile ka maatlametlo,
Nnakgolo ba akga dilepe, bomme ba feela 'lwapa,
Ditiro di dirwang e le dikao e bile e le dikeletso,
Ka tsone ba re gola moeng re di go apolele,
Ga go tlhakantshuke dilo di lolamisetswa ruri,
Tsina ya boitumelo e atile le ditshika,
Kgoroso ya lesea e kitlantse batho,
E kitlantse baagisanyi motseng.

TLHAOLELE

Aferika 'fatshe la borre le ile
Meamusu ba thari e ntsho ba e utlwelela fela
Mooka le tsina go akola barwakhunou
Masonya a mantsho a bopela tlase ka letshogo
Dikgolegelo di agetswe bone go ba katisa
Namibia ga ke bue ke a feta
Aferika Borwa gone go leba yo o sebetse
Ditiro ke di boneng matlhotlhapelo
Batho ba a tlhaolelwa o ka re matlhape
Tsela di pedi di sa ye legodimong
Basweu ba tsaya la moja
Bantsho ba tsamaela go la ntsogotlho
Ka sitega ke tsena tempeleng

Tempele e arogantswe makgamu a mane
Seemo sa ntlha go ya go sa bone
Bantsho ba ja masalela mo go sa bone
Ke ne ke okola fela tse ke di boneng
Kana 'ke utlwile' ga e tshwane le 'ke bone'

SELELO SA BAITHUTI - M.C.E. (1988)

Ntheboleng ke boleleng dilo ke di boneng
Ke di boneng tshutlheng, di tlhotseng bagale
Pina ke ya bana ba mmala wa sebilo e utlwetse
Motsemogolo wa Mokwena bana ba bina borankana
Ba phanya legofi ga go ope ntle ga koma
Molodi wa pina eo, o tlala ditsebe ke se segolo
Ga go mogolo ga go monnye e opelwa ke baithuti botlhe
E opelwa ke baithuti botlhe ba kgapha sethitho
Ga e utlwalelwe ke yo o pelo e lefafa o itshela dikeledi
O itshela dikeledi bohutsana bo mo apere
Kwa Mokwena ga Moithali-a-Sechele go dubegile
Go nka ga go sa bola, baithuti ba a ngaolega
Selelo ke sa khuranyo ya meno ba re pitsa ga e butswa
Ga e kgotleletswe ga e na mokgotleletsi
E tsentse tlhako ngabeng mathata magolo ke mogokgo
Potsogadi ya baithuti bano ke gore, 'e fokela ntlha efe?'
Motlhala wa kgongwana tsa mmuso o ba timeletse
Mmila di duleng ka one o bofitlha ga o lemotshege
Melao ya mogokgo e ba tswaletse sengomeng ga go botshelo
Mabogo dinku a a thebana, betsho thusang ka dikgakololo
Poo le yone e thata ka melala
Ka tsone go kuructsa ga bana go ka fela
Thang mogokgo ga ana tirisanyo mmogo nabo
'Foko la Motswana, 'kgosi ke kgosi ka morafe' o le lebetse.

MORWALELA WA MAHALAPYE - NGWANATSELE 1987

Ke kopane le lerwa le fuduga maloba,
Ka tshaba lepaapaa marokgwe a gagoga,
Matlhogotshweu ba tsenwa ke matlhagatlhaga.
Ke bone mase a kokometse digole di tsamaya
Dimumu di bua go seba e le selo sa maloba.
Noka ya Mahalapye mothatlotlhe e na le dinonofa
Dinonofa e nang natso di sita le tsa seporofiti.
E ne e tsentse tlhako kgamelong ka kwano
Ga re a ya dikgofeng morwalela o tlhakaladitse
Lepai re le apere le one go leba yo o sebetse,
Bakgalajwe ba re bophadiphadi ke jwa bo 1950.
Morwalela o tsene ka mahube a naka tsa kgomo
O tsene wa tlhatlhoba itsholelo ya Batswana.
Mabeelo a sa itsholelang a medile dinao
A medile dinao a bonwa a biloga setlhapi.
Tlhologo e tseneletse ditlaagana ya rutlomolola.
Mpuu o faretswe batho ba setse seteateeng
Ngwana a sa leleng o swela tharing betsho,
Ba sesole gatang sekau lo bonaleng bonatla
Tlolang majato lo tshetshise lo tshabe pheha
Namolang batlhoki, ditante di tlhongwe,
Magae a oleng a eme ka dinao,
Itseng fa mabogo dinku a thebana.

MANTLOPENTLOPE

Mabutswapele ke kopa tshwarelo, a e nne modiga betsho!
Ke bua ke lo gwetlha ka lo re, 'ya mosimane ke e nkgwe'
Dilo di eme mantlopentlope ga di a faphiwa
Di manyanyabea nna di a ntshita betsho

Mafoko a kgotla mantle otlhe
 E re ke bua lo ntheetse ka tsoo pedi
 E re ke bua lo mpeepele dipelo ke inanathe
 Tsa lona dikakgelo lo di beele motlha wa bofelo
 Ka tota lenyatso ga le na seipato
 Modimo o o nko e metsi mabololelo ke afe jaanong?
 Mmila di tswang ka one o bofitlha ga o lemotshege
 Ikwadiso ya malatsi ano, letsatsi e thiba lefatshe
 E rile le phirima ka utlwela 'ee' kgotsa 'nnyaa'
 Ka mampa a kolobe ka tshwarwa ka digašwana
 Ka tlamparelwa ka digašwana ga twe o mang?
 Tshaba etsho lo se etse phiri lo je lo itekanya
 Lo di lebele pele masula lo a tile go sa le gale
 Mamena lo a fapoge, seolo mmankwane se dirisiwe
 Ya tloga e le nosi, ya boa e ntsifetse
 Peo ya ikwadiso lo e jwale ka tsholofelo
 Tsebe go reelediwa e e gole, e e gaufi e ya itheeletsa
 Tsenang diphuthego, diteng tsa ikwadiso lo di utlwe
 Lo di tlhwaale tsebe lo di sekaseke ka makatlanamane
 Metlha ga se ya pele lefatshe le a dikologa
 Ditiragalo di fapana ka nakwana go se thona
 Dilo tse diphetogo tsa puso ya gompieno mantlopetlope.

THUTO YA MAHALA

Khutsana e sa sweng e leta monono
 Batswana lo sale lo šabetse ntša ka legotlo
 Makhumonti lo tshedile ka one
 Go wa lo eta lo tsoga ke ga lona
 Motsadi mooka, o nya marokhu
 Tota motho ga a iphetse e se naga
 Le mathata a le farafere lo isa bana dikolong
 E re le go tlhabetse o le aramele

Phatshwana e akgisa thele e lebile 'sakeng
 E khutsa e sa le mmileng e ša matsele
 Maši dithobeng a letile menwana
 Babusi ba Botswana ba gopotse batlhoki
 Dikobo di magetleng di tlositswe
 Thuto ya papetlana jaanong ke bothodi
 Thuto ya mahala ke yone mmammang
 Lo di bone di se ka tsa wela ka mamena
 Mokgokolosa di o potologe go fema dikotsi
 BooraDomi utlwalelang ke lo sebetse
 Tlhabololo go nnwa fatshe go jewe tlhogo
 O bone dilo di tsamaya ka tshwanelo
 Di neelane sebaka ka tlhomagano
 Thuto ya mahala Batswana re e amogetse
 Re e neseditse pula ra e atlarela
 Sebe sa phiri ke mathata magolo ke a
 Mathata magolo matlo a borutelo ga a yo
 Emang ka dinao Batswana lo je boswa
 Meamuso ya 'fatshe leno lo tsoge lo e akola.

SEFIKANTSWE SA GA MOSWI TAUTONA SERETSE KHAMA

Ba ga Mmabesi lo itshwareng segolo ke tle ke bueng,
 Lo itshwareng ke a itse lona lo keledi e gaufi
 Lo bo Shashe lo eledisa keledi go be go tshwanele
 Ke bua ka motho-setlou wa fatshe la Botswana,
 Morena Seretse-A-Sekgoma, motho oora-Khama.

Ga ke a tla go tsaya tlotlo ke tsile go ruta
 Ke tsile go ruta le go tlhatlhelala dikokomane
 Batho basweu ba tshwere kgaisanyo le Modimo
 Ngwaga wa 1980 Morena Seretse a fitlha tlhogo

Basweu ba bopile Seretse yo moša ka ngwaga wa 1986.

Tautona o bua le setšhaba o eme ka dinao,
O eme fa pele ga palamente motho wa Mophuting
Sefikantswe se beilwe se foo se beetswe lona,
Ke raya se beetswe morole o mosesane gore o bone
Ditso lo di bolelelwang ga se mainane ke mabolelelaruri

Moletlo wa ngwaga tse masome mabedi re ipusa o tshwailwe
O beilwe tshipi, dipalo tsa yone ke sefikantswe sa ga Seretse
Ka re matlho dialana, ga je sa ga ope
Ngwana o itsewe sereto ke mmaagwe, dilo di itsewe ke Masire,
Ke bone botautona Machel le Nyerere ba itshela dikeledi.

DITLHOPHO TSA 'POLOTIKI

Ntša go fiwa teleki!
Bontlhopheng iphutheng metlhala,
Bofang makgethe a lona lo itshware,
Noka le yone e tlatswa ke dinokana.
Ke longwa ke lekgantsetse le a ntshwenya,
Ga le njese di welang ke a tlhobaela.
Maitshwaro ditlhophong mafaratlhatlha,
Batlhophi le lona ke lo kwaisitse.
Setshwarwa ke ntša pedi ga se thata,
Tshwaragano le mapolotiki e botlhokwa
Ke lelota e ka logaganya setshaba
E ka lere thokgamo ga rena kagiso
Phala e kgalemile go iwa tlhophong
Batho ba mokwelekwele e se marwane
Talama e fetogile e dule lefetsakgang
Mapolotiki a rutile morafe khupamarama
Khupamarama ngwana' a moloi ke swa nayo

Talama ya bothlophi phiri sa pelo
'Phiri sa pelo se itsewe fela ke motlhophi a le nosi.

KALOSO YA BOBEDI YA BARUTABANA - M.C.E. 1989

Mokgosi wa utlwala ntlheng ya Borakalalo
Bontsi jwa nyedima boitumelo matlhong
Ga tsoga dithungthung 'role lwa beta mokodue
Dipelo ka fa teng tsa itaya ga boitumelo
'Tsebe ka di bopetswe mokgosi tsa o utlwa

Moeteledipele ga se mosimane, monna!
Thompson ga se mosimane, monna!
Lwa tseo lonaka o le leditse lwa utlwala
Borakgadiatsone bo-MmaChiepe ba ne ba le teng
Tao ya bothlokwa dialogane o bile a di e naya

Leruri se sa feleng se a bo se tlhola
Ngogola baithuti ba le supile le penne
Ba ganne nnang ya banyana ba itshwara khubu
Ba re ya ntlha kaloso ga re e tsene, re batla dithebe
Ka jeno letsatsi ba phanya legofi ba ja pina

Thokwana e teng ke tshaba go e umaka
Thokwana ga e a lema e naka di matsoketsoke
MmaMbaakanyi ka oo mabedi, diabe a di ntsha
Dialogane mokoloko tsa o dira di sa ye patlong
'Thunya tsa tsatsi leo lenko la tsona mmita

Pitsa e apeilwe Bakwena betsho re e bone
Dikarolo di bopang M.C.E. sebaka di se filwe
Mmino wa Setswana re bone ba gololosa melala

'College Choir' Rre Molefe ba bo ba mo segetse lefureng
Tota le badisa-melelwane ba ne ba le teng lo ba bone

Kaloso ya bobedi gata sentle tlhe re go bone
Gata tlhe sekau ka oo mabedi o a lebosega
O diragaditse la motlapele, 'mabogo dinku'
O kopantse ntša le mmutla di nna mmogo
Baithuti le Batlhatlheledi tiro ba e kopanetse.

DIKGORO TSA MORAGO

Botlhale jwa phala bo tswa phalaneng
Batsamaisa-ditiro nnang pelo telele ke lo lotlegele
Ke lo tlhabe podi matseba ka ga masula a diphetogo
Ga ke a tla go tsaya dikgang ke tshwenyegile
Maikutlo a me a fudugile mannong
Mowa le one o pholetha fela ke diphoraetso
Masaka a mmuso a agolotswe le morago di a sutlha
Tshwene di roba mmopo tlhofing ya tshimo
A go dirwe ga mosadi tshwene 'tironng tsa mmuso betsho
Ditiro di ka ema setšhaba sa tlhoka go tshela
Bofafalele tironng ya mmuso a bo fele
Naga e se nang khudutlou bo lobeto ba a ipusa
Baokamela ditiro kgalemang boatla tironng
Badirela-mmuso ba se apeye pitsa lejeje
Bangwe ba ya dikolong ka monokela ba le bosi
Bontsi bo kgweleanye ga ba fiwe sebaka
Ga ba fiwe sebaka sa go fofela moseja go ithuta
Ka bomo e senya dilo Batswana fedisang bofafalele
Bofafalele 'tironng tsa mmuso bo fele dilo di nne ka tolamo
A 'kgoro tsa morago di tswalwe
Matshoba a morago a a kabiwe ga re je di welang.